


復宿山房集

卷二十九之  
三十



復宿山房集卷之二十九

山陰對南工家屏著

墓表

封翰林院檢討徵仕郎沈公墓表

封翰林院檢討栢溪沈公之卒也其子貝差君鯉曰

夜悲號爲孺子慕無已因延諸史貌公象曰傷哉鯉

終不得承顏於先公矣有能肖其貌者則先公猶不

死也已更數史貌之弗類乃屬其伯兄照泣曰始吾

以衆史貌先公似之也乃今弗克似吾安忍遂沒先

公也伯強爲我狀先公行事務求其似焉以託于立

言者則先公猶不死也狀具介而抵王子求表諸墓  
余惟人貌榮名贊善君以青宮舊學結知人主旣逮  
事栢溪公生馳封如其官歿之日

天子又爲遣官諭祭勅所司治塋事榮名無窮矣奚  
事託于言以顯矧余謏薄奚足爲役然不敢辭按狀  
公諱杜字名卿栢溪其號其先吳之崑山人自四世  
祖福二戍大梁尋徙歸德遂爲歸德人大父忠贈禮  
部主事父瀚以進士歷建寧太守前母張氏李氏母  
李氏僉封安人建寧公四子而公居季公生而廣額  
豐頷儀觀魁然而內無城府一見知其長者始署建

寧公見背宗黨中外交弱公訟鬪紛起其黠者至欲  
擠諸壑甘心焉卒不能有加於公人謂公有天幸數  
遇暴弗爲害也然自是家稍落儒業亦浸廢不竟則  
從督學使者受諸生巾服奉建寧公祀會歲大侵生  
益匱乃棄舍取直爲旦夕資而脫身依舅氏居歲餘  
始克自創屋屋四壁立公日手詩一帙坐臥吟咏其  
中意泊如也自少工草書兼善繪事每吟咏有得卽  
模其意于畫畫不盡意則抒其緒于書咸瀟洒有特  
趣無所師承焉比贊善君知學則棄去課贊善君讀  
或手自抄牘以授間有疑義爲走質他所歸而解說

如其指亦不令有常師也贊善君既貴宗人前讐公者恒懼若無所容公顧且芘覆其子若孫遇之愈益厚視置宿憾不啻棄遺跡矣性喜酒有田一區歲務多種秫爲釀具卽醴粥不繼不以其故廢飲蓋晚而病未疾猶時時引酌然常以夜每抵暮輒命諸子入侍遞奉觴爲壽或至夜分乃罷病以此稍益浸尋焉嘗戒諸子曰凡有所市於人我成彼礪我羸彼詘也寧溢予之無溢取之豈必得在我失在彼哉友愛諸兄弟尤篤諸姊貧無資者衰且死無託者公悉調護振給之終其身不少間視諸兄之子與視其子一也

方贊善君舉於鄉蓋與伯子照俱報者抵郡城下更嚴未入城中人傳言沈氏一子舉矣公不問其誰也遽攬衣起命酌自賀家人言公安知舉者爲郎君而喜如是公曰得一足矣莫非沈氏子也人至今稱其言王子曰曩余從贊善君史局中習知栢溪公逸行以今觀于照所爲狀誠如其言不虛方建寧公歿公藐然孺子耳而以身居不逞間屢脫于危此非獨有天幸必有所用以自全者嘗聞古之至人其神天游故能勝物而不傷公逍遙于圖書吟咏中樂而忘其貧非心有天游則惡能泊然無累如此乎以能置德

怨齊得失忘彼已虛而委蛇於世殆得全於自然者  
 焉意公善飲豈以其全于酒者若彼遂全于道者若  
 此哉余特論著其畧其鉅者方託大方以顯余不能  
 詳之矣公生正德己巳十月廿七日卒萬曆丙子十  
 一月十四日享年六十有八配宋氏封孺人側室馬  
 氏子男四人長鯉卽贊善君娶張氏贈孺人繼周氏  
 封孺人次鱗娶朱氏繼陳氏俱出孺人次鮪生員娶  
 許氏繼張氏次魯娶何氏俱馬氏出女二長適段鍊  
 早卒次適生員劉燭孫男五人墀坪城埭垓孫女八  
 人塋之日爲某年月日其墓在城西十里亭之側從  
 賜兆也

貴州左叅議贈戶部左侍郎王公墓表

始某小子爲諸生時受知于督學灤川先生所以獎  
 予之甚厚猶及記先生訓飭士每以忠孝大節爲勗  
 士用烝烝起咸克有樹于世若郝尚書杰田通政蕙  
 李方伯承式其顯者也卽某無似以不得其職乞身  
 歸先生而在庶幾免非徒之斥焉去世滋久教澤如  
 存會少司徒見峯公豎石先生之隧道屬某文之願  
 有述也按狀先生諱重光字廷宣系出瑯琊自王大  
 父貴徙居新城貴生伍伍生鱗教授潁川王府以先

生貴贈戶部主事先生少穎敏髫歲能文章角卯補  
邑諸生選貢太學每試常冠丁酉舉鄉試第十人辛  
丑成進士授工部主事奉命治水徐洪聞潁川君病  
倉皇趨省抵河阻風仰天而祝親病人子恨不能奮  
飛乃一水盈盈爲風伯所制天乎胡能忍予俄而風  
息舟濟人以爲孝感焉旣至潁川君病間御之洪上  
洪爲漕艘孔道懸崖巨石旁觸下撼時虞不測先生  
爲鑿險築堤舟至得無留行運事賴之潁川君疾再  
作營治無驗歿而奉其喪歸哀毀踰禮服除補戶部  
郎權稅九江渡潯投盟書其中曰所不砥節奉公而

私一錢于橐有如此江旣受事盡廉其弊竇塞之宿  
蠹爲清庚戌虜大寇雲中朝議以先生具文武材擢  
僉憲備兵雲中兼督學政時大將軍仇成寧鸞新貴  
幸氣勢熏灼先生與處務以理勝之其部卒數十萬  
衆聚鎮城內外數攘奪酒食于市占據民舍迫辱人  
婦女先生命邏卒逮至重法繩之鸞改容謝過惟謹  
倉儲不繼鸞操所司甚急先生從容謂鸞士得米易  
耳得金難折支可乎鸞欣然聽許于是士喜得金官  
不苦餉公私賴之鸞初議開馬市意在啖虜自紆而  
虜數出其羸瘠馬要厚直得所欲去因復入掠如常

鸞不能禦先生教鸞市視馬良驚上下其直兵視虜  
順逆張弛其威虜漸戢不敢逞其後鸞用部將言襲  
虜失利欲盡法堠卒自解先生簿問歎曰冤哉莫夜  
潛師出塞堠卒安所施耳目乎則盡釋之辛亥我軍  
與虜戰裨將某逗遛不進行金請免叱去之竟傳去  
罪吳總兵卒僂平民幸首功立斬以徇于軍焉居雲  
中二年兩蒙金幣之賜癸丑晉少叅移守上谷列機  
宜十二事鑿鑿中窾而以戇直忤中外當事者意調  
之貴陽時弄蠻猖獗攻剽赤水摩尼間而撫臣方以  
三殿之工受命採木道路梗塞甚以爲憂檄先生決  
策先生計諸蠻所恃衆與險耳乃分部諸校馳據要  
害絕其援而自統大師繞出其後諸蠻皆狼顧奪魄  
驚若從天而下先生因勒單騎前諭令自新衆咸懽  
呼羅拜感若更生捷聞

上嘉其功留督大木先生益感奮自效出入山箐中  
窮高歷深至以浮槎涉飛湍釘履陟絕巘屢瀕危弗  
阻也旣得異木籍奏而衆視其峭壁千尋迴流百折  
懼出之難先生製祝嘏詞三章昭告山川之靈禱焉  
禱畢木行若馳衆以爲神然居瘴鄉久竟觸霧露而  
病病篤猶輿疾出視木還而顧謂兩子吾以王事故



瘞身事幸而辦死可矣言訖卒是爲戊午八月十五日距生弘治壬戌十月二十五日年五十有七事聞上憫其忠勤詔賜祭一壇壬戌三殿告成大司空申敘先生勞烈詔追贈太僕少卿是歲少司徒公登進士人以爲有天道又二十年而得加贈如少司徒官先生配劉氏封太淑人子之翰國子生封河南憲副之垣卽少司徒之輔戶部郎之城溫州府貳守之猷河南叅政之棟廩生孫象乾巡撫都御史象坤山西方伯象蒙江西道御史象賁太僕寺寺丞象斗戶部郎象節翰林檢討象恒祥符今象恭象晉俱舉人象

震象艮象復俱廩生象鼎象旭象豐象益象巽象履俱庠生曾孫十八人玄孫一人嗟乎自致身之義缺而世鮮純臣匪獨其於君國疎所以自待其身者固薄矣先生幼失恃三更繼母事之如所生兩弟蚤夭撫其遺孤如已出與鄉人處恂恂如也居平見謂醇謹質行君子耳乃其當官蒞事利不靳苟就害不靳苟免鞠躬盡瘁死而後已抑何凜然烈丈夫也蓋先生嘗署其門曰赤心報國直道事人本其素所期待要自不薄而漢賈生乃謂人臣誠死封疆者在上所以厲之若先生者誰其厲之哉生而位不滿德歿而

賞不售勞志士嘅焉及觀其子姓起科第爲鉅卿重  
帥侍從監司者賁相望于一門而貴筑之門肖像建  
祠秩春秋之俎豆然後知先生之弗祿詘于身者盡  
垂裕於后昆而約于一時者乃侈其報于千載也天  
祚明德人貌榮名寧有旣哉系之銘曰瑯琊華胄鄒  
魯大儒學探道奧志攝氣樞鑿石呂洪狂瀾抵定投  
書潯江清衷可鏡旬宣雲朔師表衿紳英髦蔚起允  
荷陶甄匪直人文一新觀睇肅肅軍容翕安節制倖  
帥跋扈虎尾是蹂朋邪根據鼠器可投蠢爾弄蠻信  
信狂吠計扼其吭反擊其背疾雷乍震膏雨隨敷凶  
渠請死老稚懽呼以奏膚公

天子曰嘻山則有木汝留度之乃入深林乃升大麓  
瘴雨晨馳嵐煙夜宿梁木甫集哲人遽萎卹恩昭錫  
慶祉冥綏竇桂王槐周楨翼翼丕踐先猷永扶皇極  
先生之烈二儀行空先生之節百世可風其徒爲文  
表之隧道言具有徵汗不阿好

封南京尚寶寺卿沈公墓表

烏程沈氏世以文獻爲湖之望族自余釋褐識今少  
司空鏡宇公于朝悛悛鞠躬君子也已復識公二子  
公車下二子者灌與演也演以春秋灌以詩金薦辛

卯京闈第一人明年連舉進士于是沈氏之家慶益奕奕盛寓內矣歲乙未司空公介書使抵余山中以尊翁之訃來告且屬余表其隧曰先大夫治命也余自惟推無文無足辱翁知者及讀狀徵睹其德履因知沈氏所由盛而又知翁之有取于余本之質直厭綺語意謂推無文者之詞或近實而不誣也其安忍辭按翁之先自九世祖撫和公始五傳爲贈儒林郎維維生全怡全怡生空菴公汝梁汝梁生兩川公熾舉正德己卯鄉試娶于溫生三子翁其長也諱塾字子居號異洲生有至性數歲失大母李朝夕侍空菴

公茵七能委婉承順當其心空菴公口授翁書史旁及宗姻鄉曲世次門地俗尚推移過耳輒記覆之一字不錯十歲空菴公卽世佐父兩川公襄事豐約有適兩川公以爲才年十三受易已更受禮已更受春秋十年凡三徙業以二十二歲補學官弟子員竟卒業春秋其治左胡公穀等傳疏用百日盡綜其異同著爲說自專門宿儒莫能難以是沈氏世受春秋顯兩川公之與計偕也翁冲年攝冢秉事常辦厥後四上春官勸游不出悉以家政付翁翁從鉛槧間抱筦鑰程督之用拮据節蓄積織致羸而出入鍾量平媠

知有需隨叩立應不以治生難靳施舍也丁未兩川公棄養柴毀不欲生奉母溫二十年孝敬猶一日庶毋顧有乳哺恩存事歿哀不殊所出其內行純備如此尤開朗有幹局事倉猝至前能毅然笑避趨決取舍爭得失不可以禍怵利汗晷倨撓也歲寅卯倭夷內訌挈母溫暨家屬千指東西避護持于烟波烽火間卒完其室歸亡何白巾賊起詐言有神符天兵所嚮燔掠甚慘民率空室廬走公獨戒近堡人毋動籍少健得三百人各署之長裂白巾爲旗幟分部而守時奸民有欲應賊者計沮賊尋知有備遁去闔竟以寧

庚午冬築室培地得藏金役人以告翁曰室吾室也藏非吾藏也趣白縣縣遣吏至而惡少年竊聽者已闕然聚而攬之翁得不染于爭庚辰歲侵米價翔貴今中丞李及泉公爲湖守謀抑其值翁曰不可夫米惟其貴也而聚聚則反賤抑之販夫他徙米益不來民有懷珠玉而槁耳不聞富鄭公之在青州乎聽民自爲值而民便李公悟遂不減值李公素簡亢少所容接獨莊事翁翁中情潔白心所自信毀譽莫移事所宜言肝膽可瀝曾不以形迹故嘖嘖也則恹恹忠益足諒已司空公尚檢柙家居絕不通造請翁笑謂

若遠嫌而自為重得矣如粉榆之急何夫嫌生于私  
 不私何嫌云何不自信也司空公守祠部時雅善平  
 湖陸公吉水曾公兩公尋移天官郎霑接寢疏翁謂  
 司空兩君賢宜忘已爾賢宜忘人此兩相重也何至  
 中道而廢平生建儲議起言者強聒不置翁竊嘆言  
 期濟事無濟于事奚庸于言言輕則主聽疑事敗則  
 任者難乎其救嗷嗷何益翁似此扼掣數寓書邸中  
 及之余至今服翁之先見焉爾時得翁鎮定調護之  
 豈至絲棼衡決如今日哉翁經術該洽為文簡奧有  
 尚書爾雅風盛年銳意當世謂功名可指取晚而自

傷不逢乃攬摭經史百氏疑義未安者衡以已見思  
 勒成一家言會病目未竟則念沈氏聚族且百年不  
 可當吾世而今宗系失傳佚先人之微謔弗著因倣  
 歐蘇二氏例作族譜歲時率族人上冢周省封樹掃  
 除奠獻雍雍秩秩如也舊獨春祀至是復增秋祀而  
 益拓兩川公所置祀田凡若干畝克費間祭族人之  
 貧者孤無依者賜卹之勤生力學者獎予之其皆竊  
 教盪則面數而切責之以是舉宗斤斤遵約束唯謹  
 教家更嚴庭闈間肅若官府晨起攝衣冠出長幼畢  
 從夜則篝燈危坐子姓左右侍為陳說德義評隲古

復宿山房集 卷之二十九 十一  
今常疊疊至夜分忘勅而平居所御無統綺之飾雕  
鏤之玩絲竹之娛泊如也惟篤好六籍卽垂老猶大  
書特誦若經生但不喜爲詩及觀西竺南華氏之書  
以爲卮言無當左道非經也旣貴郡守過臨具盤餐  
饗之或言守貴人宜有加禮翁曰柰何以守貴壞吾  
素風兩孫仕京朝書誠之曰士惟敦實行求不愧此  
心耳奚必立門戶樹願頹爲名高而父三十年官評  
非以建言講學重也師而父足矣嗟呼士通則寡脩  
介則鮮任蓋兼材若斯之難也翁淹貫三經挾微四  
傳可不謂通儒哉非道不說非其有不取抑誰如其

介者乃褫身教家仁親睦族一軌于人倫何其脩也  
童子而堂構書生而扞城爲守宰畫便宜爲宗社朝  
省分猷念又何任也世多推高翁獨行獨行烏足以  
盡翁覘其學爲已而無近名要歸于實踐庶幾不愧  
屋漏之君子歟翁用司空公貴凡三拜命而至奉政  
大夫南京尚寶司卿配閔爲宜人其卒也詔賜祭一  
壇並祭閔宜人給半塋不爲例制詞褒之有曰學窺  
理奧動秉義程行誼篤于闇脩籌策關於經濟煌煌  
天語亶其傳翁之神千載如生矣乃翁易箒時猶若  
有念也者以不及待司空公秩滿馳恩兩川公也時

兩川公以季子政和君最贈文林郎而母溫贈孺人業稍稍慰地下翁孝思卽有所不足乎而燕貽之慶固潢然有餘睹于子姓蒸蒸簪組蟬聯之盛亢宗顯世方熾以昌國恩殆未可量已以是表翁翁當無遺憾也夫翁生正德壬申七月十二日卒萬曆甲午八月五日壽八十有三子五人長之歷卽司空公節甫以字行次大學生之鑒政和尹之峯俱閔宜人出次太學生之釜膳部郎之塗側室吳孺人出女二長適光祿寺丞錢士完次適太學生徐國霖諸孫淙舉人漣翰林檢討瀟駕部郎沾太學生如潛潛渭滑涓濤

金庠生嫺文學有鴻譽淳淳幼孫女十六人曾孫男十人曾孫女九人婚嫁皆名族詳載誌中不具書

都察院右僉都御史李公墓表

余與大中丞敬田李公同舉於鄉又後先成進士以建樹相期許不自意侍

上講幄備員政地公由瑣闥歷藩臬建節酒泉張掖間詒書謂余公在中書余在邊邊事其有濟乎壬辰余以爭儲議不合賜玦還山公亦罷鎮歸出處畧相符也互問眠食俱幸無恙乙未有大星隕霍山下公意殊不懌竟以四月十有七日卒于里第故事撫臣

物當加邊賜兆公用言者去誣狀未白格不得請於  
 是公嗣時華等卜兆厝公而乞余表其墓余知公深  
 誼不獲辭乃捃撫公遺事書于麗牲之碑公諱廷議  
 字國瞻別號敬田自上世為霍人七世祖真用人才  
 薦起擢守滇南五傳至贈都諫公文勝是為公父配  
 郭氏馬氏許氏皆贈孺人許孺人以嘉靖己亥正月  
 六日生公公生有異徵夙慧過人髫年從其鄉尊宿  
 姚先生者授尚書問難數詘其師姚因大器公妻以  
 女自是為諸生有聲黌序間甲子領鄉薦辛未始釋  
 褐時虜新款塞廷議除甲科有才望者治邊邑公正

得吳堡地僅大縣一鄉而賦寔埒大縣公謂邊氓為  
 國扞圉柰何重困之諸法外征徭一切報罷民困少  
 甦又延其秀穎子弟訓迪獎誘之士皆雅化用治效  
 調洛川令洛川故稱沃壤而河壩田齧于水半為砂  
 礫民無從出租輒亡去公稍減其賦而蠲帶徵徙者  
 盡復租得無逋俗善囂訟公引情理兩解譬之服則  
 遣去不罰一鍰民為之謠曰李青天不要錢徵命下  
 民板臥載道鋒車幾不前去則肖公顰尸祝之至今  
 訟公不衰公既入為給事直兵垣乃上言金邊諸郡  
 邑疾苦狀請以詔書優卹靜寧鎮原諸路已又言臺



臣省臣閱視京營者宜共事不宜分番已又言戎政積弛宜振刷條上七事悉中窾

上皆嘉納之報可庚辰改吏科左給事中尋擢工科都給事中愈益發舒三上書言事謂鑄錢積穀之令宜弛東吳織造之數宜減中貴陳乞之濫宜禁時論肆之河決爲患朝議紛呶公請開新河以避黃流守舊隄以固青浦司空以公筴屬治河使者河工底績上推原公功賚予甚渥忌公者不欲公在近禁循例遷公河南叅政治兵汝南汝寔繁有非徒公謂誥盜當先恤民禁侵漁廣賑貸嚴保甲謹譏防朞年盜盡解去爲農汝在唐邨封內所需屯糧例當有司徵進護衛諸弁利乾沒欲自收之公執不可軍民胥大快稱便其尸祝公頌公無異洛川也丙戌大計公以治行卓異奉詔紀錄臺省交章薦邊材皆首推轂公遂遷公陝西按察使治兵固原固原節鎮重地兵事旁午公約束將吏拊循士卒儲峙糗糒疆場之事無不備不虞者督府郤公深倚重公嘗稱公處官事若家事用官財若已財蓋自謂不如也鍾侍御閱邊還報公功詔賜帑金旌異亡何甘肅撫臣缺上允廷推晉公都察院右僉都御史授節鉞往鎮其

地鎮孤懸天末套虜生心患叵測或爲公虞公曰人臣義不避難惟上所使旣許國能復愛身乎彼叱馭者何人也慷慨就道旣抵鎮核尺籍伍符申明司馬法厚撫屬番得其死力令爲謀以偵虜虜酋莊明者修水泉郤誘吉能萬衆入扁都將內訌公堅壁清野休兵秣馬待之虜知有備齧指遁去己丑虜王以讐瓦刺收丙酋表請由朔方赴青海已得請公列上防禦機宜卽部署諸將守要害備非常虜王至境果橫索宴賚拒不聽省幕府金錢以萬計其支部闖入永昌定羗者公又夙戒偏師闌擊之斬馘甚衆顧獨不

欲上首功徼賞耳而西虜火酋者入寇洮岷我師失利所謂風馬牛不相及也言者詆公觀望失援公不自明上疏直陳虜情始末乞身歸時李給諫閱視關以西廉得公備虜狀甚悉上言撫臣某有功無過不宜聽其去今勞臣解體不報公歸口不言西事而居恒佗傜仰屋竊歎竟病怔忡不起悲夫公天性孝友事後母不異所出割貲爲兄償責育亡弟孤數爲德于鄉閭事甚夥可謂篤行君子矣然剛腸激烈言無囁嚅不盡者在諫垣所上封事不關白政府江陵公銜之以請罷大臣閱視奪公俸六月公竟不爲屈河

南守趙君繼節忤江陵指逮繫闕下客避匿不敢見  
公力爲營救出之尼或謂公柰何逢相怒公曰余知  
有故人不知有相也公再校關中士一校禮闈士所  
錄皆名流布滿中外公罷謀薦起公公謝不敏夫公  
豈悵情于得失者獨念封疆之臣業已致身綬下而  
卒不得一當虜以報

天子所爲居恒佗佗僚仰屋竊歎者以此嗟乎李廣不  
侯說者謂其數奇彼直猿臂善射一將之任耳志士  
猶爲扼掣矧以公長才偉畧揮霍擔當藉今假以便  
宜不爲中制趙營平之老成特重班定遠之宥佚簡  
易不足侔也而今已矣可勝扼掣哉余特表而出之  
俟世之持公論者采焉家世昏姻不具具誌中

贈陝西布政使司右叅政李公墓表

某嘗考覽晉乘而知吾里之多賢也顧所紀率名公  
鉅卿以宦顯者而高士逸民不少概見豈其潛德隱  
行修之冥冥世不及耳而目之耶則與黃耆牖下沒  
世無稱者奚擇焉余因是慮史傳之闕遺也爲中丞  
李君父贈藩叅翁作表表其墓翁諱憲其先河津人  
國初名彥祥者徙居解三傳而生慶慶生壽翁壽之  
長子也生而穎慧見鄰舍兒挾筴伊吾心好之願與

俱父辭以家貧不能行修則竊從兒所循聲誦習之  
久之通書大義學字字亦奇進遂以善書聞里中里  
中人咸詫翁田家子安從謁師識書工翰墨乎翁不  
自明也逶逶謝不能而已父物家中落所遺薄田草  
屋至不能供饘粥蔽風雨翁出入作息其間神情閒  
暢視世所徵逐芬華靡麗之習泊然無營也是時弟  
宰甫髫年翁所以拊愛之甚備長而爲之娶婦教以  
治生俟其力能自食而後出分分又特推善產予之  
宰是以立居數歲家漸饒間與二三高年結社施漿  
以救暍者姻黨緩急有謁于翁無不得所欲去不責

其報亦絕口不言德也客有鬻石硯者售未竟迫他  
故去寄硯三篋于翁值可數十金去二載還殊無意  
索硯矣翁昇還之封識宛然客德翁甚徧以其事告  
人人莫不服翁長者郡守高其行義署爲里正里徭  
賦供億一切責翁咸應手辦卽州人訟不決者爭口  
語不相下者就翁質數言是非立平守器翁才諳遇  
翁益厚而翁益斤斤務斂飭會審編閭右豪利輕賦  
而移重于翁力擠翁守前加翁數算衆咸不直豪爲  
翁切齒翁獨不辯曰吾非不能白之于守懼挾守之  
重以自解免負不義名寧彼負我耳始翁之舉中丞

君也星家占當大貴翁私喜至是文譽藉甚每試輒居弟子高等翁益喜自負歲辛酉舉於鄉還拜庭下翁誠之曰吾家世農也不自意得兒以亢吾宗吾卽旦暮地下可矣所願于兒者以謙抑居鄉以忠盡報國毋恃勢而修怨毋背公而營私此吾之志也兒其勉之於是嚮嘗寄硯于翁者聞中丞君舉手額歎以爲有天道而擠翁重賦者聞翁誠中丞君語亦慊然自愧責感翁之容德也居二歲以癸亥夏某月某日卒距生某年月日享年若干配王太淑人柔明端慎有婦德當翁居約時拮据蚤夜積微累織以佐之翁得不困翁卒而中丞君方弱冠太淑人益務勤儉以佐中丞君學不使家故分其心也隆慶戊辰中丞君舉進士任閩州司理太淑人數問治獄平反幾何以傳生義爲悅大率如雋母中丞君徵入爲戶部主事值覃恩得贈父如其官而封母爲太安人以萬曆己亥某月日卒距生某年月日享年若干卒又數年而中丞君任陝西右叅政奏滿乃加贈翁中大夫母太淑人子男二長春霽先卒次春光卽中丞君娶丘氏贈淑人繼喬氏封淑人孫男一爲棟庠生孫女四長適太常少卿孫維清子懋德庠生次適山東按察使

趙欽湯子楨次適庠生閻叔和子雍次幼嗟乎知力  
 之於人惟無所藉則已苟可藉以為資巧者飾藝貪  
 者徇財夸者乘權競者怙勢不極其欲之所至以自  
 快不止翁殖學優于為儒而名不斬達力田優于致  
 富而貲不斬羸權能得之官而身不斬庇勢能得之  
 子而怨不斬修聰明疆毅之資可以有為而能不為  
 而獨陰行善于冥冥之中若施漿還硯二事其中心  
 慈祥精白可以格天地質鬼神不但知所取予而已  
 肆克闡慶于中丞君用文武才擁節旄重鎮而樹安  
 攘之烈寵承

天子之休命以光顯翁方融未艾固天所以厚善人  
 之報而宜昭其令名不欲其沒沒者也某與中丞君  
 及孫太常趙憲使並同年友至善數相與敘家世道  
 故舊習翁之潛德甚詳因表而出之以副晉乘

贈行人司右司副李公暨配孺人武氏韓氏墓  
 表

贈行人司右司副啟菴李公余同年憲之父也憲自  
 登進士官行人轉右司副蓋時時追慟其親每語余  
 曰憲甫髫受書先君尚記先君夜然膏課讀時家貧  
 膏不繼燎薪代之也稍長遣從先伯兄學伯兄邑居

先君恐意不能離遠則更日一至邑中以為常先君  
卒先母韓承先君志懼意廢學至躬績紕以資熹費  
不足卽脫簪珥無難矣以先父母之恩勤庶幾食報  
一旦竟弗待以死傷哉語畢泣數行下余深悲憐之  
會

上登極覃慶得贈父如其官母為孺人因奉使過家  
乃載冊書告墓已益治封樹周以繚垣前豎綽楔中  
建祠亭徵余詞表諸隧道余旣君同年又其孝思有  
足述者則不敢辭按公諱鑰字德握別號啟菴其先  
隴西人唐末有宦太原不返留居東岡者洪武初諱

繼先考自果岡遷祁遂為祁人繼先傳三世生鳳鳳

生子瞻子瞻娶溫繼邢生六子長銘次鎧次錠次贈

公次錫次欽公為人質直無它嗜好少居城中出見

紛華心厭之曰丈夫不自苦筋力安能飾衣履從市

兒游乎則去田城趙城趙者趙簡子故里其地僻甚

公往旦夕揆畚鍤作勞田間人罕識其面歲以所獲

輸父母父母喜謂諸子中獨季子治生力也公雖業

農未嘗咕咕效儒生然少間卽涉書史以自娛其居

處言動壹遵古人而內行尤篤事父母出入必告曰

古人事必告天吾有事必告父母父母與天一也居

兄弟間曲盡友愛以兄銘出前毋事之倍恭始田城趙旁近有失業田數頃為眾所據族人謀奪之則陰風公曰彼留留來田者皆無所受券宜及其未定取之多則可併寡則可分也公厲聲曰彼利人之亡而有其田不義已甚從而爭之則我與若奚間也吾寧捨穗而食不忍受不義名言者乃止甲午歲饑公家廩董董自給顧時出粟以周餓者或設糜粥食之里中李時奈等十餘人餓且死咸賴公得活配孺人武氏韓氏並有淑德武所遺女韓拊之一如已出資嫁甚厚公既任義好施孺人益佐之以慈惠故貲稍裕

輒盡人或勸公孺人居積公孺人指司副君謂曰有兒如是積善以貽之顧不昌耶竟如其願云公卒嘉靖庚子九月初七日距生成化丙午三月二十九日年五十有五韓孺人卒嘉靖壬子三月十六日距生弘治己未正月十七日年五十有四子一熹即司副君娶王氏繼董氏俱贈孺人繼呂氏封孺人女一適趙時隆即武所出孫男一自知庠生娶趙氏孫女一適庠生馬化麟史某氏曰世俗熙熙交騫于利即寸畛尺域必爭訟或彌年不休也富有貲者乘人之急而收倍息實不能徒假人一錢以公族之眾視及侵



地若稍諸寄耳而義不苟取至其拯困救乏則不啻自七箸間節之非心誠仁愛敦行善者乎蓋司副君既貴乃知天之所以報施善人者不虛雖不逮祿養其榮名無窮矣余特論次其畧今後之考德者有所觀覽焉

贈戶部廣西司主事趙公墓碑表

予與沁水劉晉川君同讀書翰林時明山趙君主計部晉川君蓋與同邑為予言趙氏世德之厚里中莫及也已從明山君遊乃見其器宇宏朗與人不毀畛域則竊歎曰斯晉川君所稱為不虛美者哉無何明

山君晉秩郎中奉命督餉陝右將行持其先考妣承德公太安人狀丐予為文以表其墓予既嘗知公之家世則不容辭按公諱芬字伯義世為沁水人居武安村西去縣百里其先曾祖璞祖弼祖妣劉父傑號館東老人妣關寔生公館東公嘗服賈松滋間携公與俱而屬弟孟舉以侍劉公一日請曰大人遠涉數千里外所營息非欲以奉吾大母哉顧吾大母年且八十視吾叔伶俜懇不能任門戶兒幸逮事吾大母此天使以報劉而成大人之孝耳兒留家便遂止不往未幾叔果卒劉失明公養生送死悉如館東公所

自盡值歲饑諸弟姪共爨殆五十口公調劑盈縮能  
人人給也性耿介不苟言笑每燕居端坐闔內肅然  
諸子稍長卽令就外傳外傳不及課卽自譙責之至  
鏘其館終歲不令窺園市里中少年有爭論者聚數  
十輩不能決公前以一語折之衆爽然自失矣且愛  
人喜施人有急難捐金助之不問其能償與否嘗曰  
責報則計利急人知則近名業已施之而又欲其德  
我何心哉故生平植德樹義務在沉晦耻以矚然之  
迹炫耀於世嘉靖壬辰六月妣卒公一哭輒欲絕輒  
不飲食竟以是遘疾不浹月卒是爲七月十一日也

距生弘治丙辰二月二十五日年三十有七太安人  
馬處士騰遠之女女紅中饋咸精尤喜勤儉日媿媿  
操作無勸色姑甚重之指爲婦中模楷方館東公從  
松滋還賓客日更迭至太安人爲更迭治具茗饌如  
一卽承德公不知其所繇承德公卒太安人撫二孤  
謂之曰吾茲忍死冀汝輩成立以慰汝父地下耳乃  
自紡績以佐二子二子憚太安人嚴亦爭自濯磨勃  
勃然振也庚子明山君舉於鄉則太安人喜曰吾可  
歸報汝父矣尋疾作以甲辰十月二十日卒蓋年五  
十有一嗟乎以予觀於承德公夫婦豈非各成其志

者哉當館東公賈遊於外以一老媪丁愛子之喪無謂其理棺歛難也卽冢子若孫無一在側而眈眈然西向而泣其能以壽終哉故劉之以壽終也以承德公爲之孫也承德公沒以二幼子奉一孀母度所治產祝向時五十口之家益拓矣非得善持者卽二子奔走不給奚遑誦讀焉故明山君之貴也以太安人爲之母也然承德公哀毀以殉母其以孝終矣太安人後承德公一紀成其二子而始繼之以死非完節哉肆今恩錫封綸光賁泉壤過而歆艷之者曰此承德公太安人之墓也則豈世之昏昏悶悶湮沒無聞者哉孰謂天道難知也公子長大倫卽明山君娶常氏封安人次大化太醫院醫官娶王氏女二一適張君圮一適馬文明孫男三鎰娶王氏鍊生員娶馮氏倫出鈞生員娶裴氏化出明山君始爲山東夏津縣令丙寅冬以考最徵入計部其受推贈則今皇帝改元隆慶之丁卯也得備書云

封文林郎榮陽縣尹張公墓表

余自病廢歸里提關臥一室不復操筆爲文詞而栢鄉張駕部君向尹長治有惠愛乙酉典試省闈余子濬初寔辱收焉因知其尊人榮陽公賢蓋燕趙間侗

儻豪雋士也榮陽公卒之年駕部君介傳太史惟明  
所爲狀抵余山中乞表其墓使再三至不獲辭爰力  
疾而次第其事公諱翰字以清別號栢菴四世祖遜  
自太原榆次徙家栢鄉生文中文中生揆揆生璨官  
京口督郵配趙氏生三子公其仲也少受學里中魏  
先生與其子少司馬公共研席端謹不嬉先生特器  
重之丙午補邑庠弟子尋與兄弟析箸夾城而田晝  
東西走視壘畝夜篝燈伊吾達旦以爲恒其學於書  
無所不闚有得輒手錄成帙同學咸推其該洽焉壬  
子督學阮公拔首多士廩之學宮乙卯秋闈擬當魁  
選值督郵公捐館奔還遂寘不錄其後屢舉屢訕士  
論惜之乃公嶽嶽自負益務飭行砥名表見于世不  
欲碌碌作章句儒徒徼科第爲也公九歲時執大母  
喪哀戚如成人比大父疾公躬侍湯藥扶掖床蓐間  
累月大父心重公臨終以少子瑁託之竟輔之成立  
焉督郵公之沒也母趙善病孝養備至棺斂具皆先  
事辦少弗精良後輒更嘗治一櫛選材千數百里外  
賈三倍購之不以有兄弟誘兄公安簿幹待選銓曹  
墮中貴人局約質其四百金爲請求費謬言識公冢  
嗣上舍君可憑也事後不酬公安公日譟上舍君索

償曰姪寔誤我母趙患之公曰以兄故詒母憂以子故干兄恚以財故汙子名無一可也則盡括家貲抵之庾廩如洗弟省祭公乾嘗爲仇家所構賴公力救得脫已巳公以久次當貢而會省祭公病困徘徊不忍行方留與庀後事而姪時爲縣庫吏以宥佚虧庫金百聞部使者且至一室盡驚計莫知所出公走貸魏氏金還官而徐割其產償魏姪又得脫省祭公乃從蓐間叩謝公曰兄恩深無以報願以某田某園抵負公洋應以慰其意卒不取然坐是失貢期至辛未乃獲與計偕故事有賓興費賦之里閭公辭不受令

曰例也不得已受其籍註完以報實未嘗入一錢歸自太學哀先世遺蹟爲譜以聯輯宗人春秋率以上冢修會食禮藹然有古敦睦之風焉時里有郝能妻矢節撫孤垂老無間公白之監司旌其門庠生魏大本註誤繫獄公理出之又條例八議上之學院龐公撫院宋公兩公覽公議咸擊節稱賞謂經生中安得此人殆經濟才也已卯拜滎陽令邑苦逋賦民多亡徙公至廉知弊由里胥侵匿故乃計田算租人授之牒令自詣縣輸不復關里胥手租自是不趣而完而前亡徙者數百家皆相率復業公益市牛種贍之已

覈其徭役偏重者供億冗繁者郵傳冒濫者囚徒淹  
恤者具爲擘畫其便做前所條八議推行之不朞月  
而利蠹興除殆盡又察孝子順孫貞婦褒表之黷倫  
傷化者按法勅斷之風教一新周藩寢園距縣東南  
鄙內豎數恬勢爲虐公至榜禁格境上其人凜凜歛  
戢鄰邑生田榮陽者謁公卽客席公曰田榮陽榮陽  
民也安得據令上命引卻其坐生惶恐謝過乃罷公  
旣廉不受餽同官有約公餽上官者公曰餽須多金  
吾不能剝民膏投餒虎也或勸公少巽公曰吾昔爲  
諸生博士師謀勸借富民構尊經閣以吾不可而止

同舍生酗酒擊傷人約闔學生具牒懇有司亦以吾  
不可而止自吾師友不能以非義要我乃欲我以非  
禮媚上官求容乎有去而已遂解組歸與親故醵飲  
爲樂間乘欸段恣遊原野遇方士諳養生家年者延  
而館穀之與談經伸導引之術疊疊竟日弗厭也晚  
以駕部君最績馳封文林郎慶祉方茂偶以哭仲子  
過傷遂病痿不起傷哉公方面豐頤美鬚髯儀觀頎  
偉而愛人喜施喜豁如也自三族中表饑寒疾病婚  
喪待公而贍給者無慮數十輩它所振救若賈豎走  
卒盲子乞兒全活于衢市者甚夥然不自爲德也嘗

道遇洛中卒染疫垂斃公探囊中藥投之立甦復資之錢以去他日卒番上持香芋獻公且言往事而公已忘其爲繫桑之餓夫矣存亡死生不責其報所謂燕趙間倜儻豪雋士非耶顧倜儻豪雋士多矜尚意氣而闊畧于名檢公自爲秀才已卽慕董江都之正誼范文正之先憂其經術議論可以有合而不求合闇修實踐壹軌于人倫至不難破產以全恩迂其身以徇門庭之急古學士所稱有道仁人曷以尚之及觀其審取予決進退之義皜然不受物之滋垢抑又異乎世之汶汶冒没于利祿者矣雖位不配德乃功

見言信志亦少售焉聞先猷而光大之俾家慶國彞焜耀罔極寧不有待于後之人哉是用表而出之以詔來哲公生嘉靖乙酉閏十二月十日卒萬曆乙未二月廿九日壽七十有一元配安氏生子汝敬篤敬俱太學生先卒女一適解元馮嘉遇繼褚氏封孺人生子主敬爲兵部車駕郎孫男七孫女四曾孫男三曾孫女一婚姻多名家詳載誌狀不具書

司禮監太監張公墓表

張公之秉司禮也

上方操英斷斥逐權貴釐弊蠲苛拔幽振滯嘉與天

下弘在宥之理熟視左右誰可綰事者命若曰咨爾宏老成端雅忠勞茂著其旦夕祇奉予一人予一人其勤用德爾無比于儉人弗恭厥辟惟爾辜蓋

上亦監前車而難所代其慎重如此公既受命務孳孳奉法循理潔已率屬細大之務壹軌于令典諸所調護宸居將順德美者力爲多焉天下頌

上明聖而歸公之能事上也無何公以疾乞休無何而公溘然逝矣訃聞

上爲改容易服諭祭九壇視故事有加賜寶鈔齋糧銀幣甚厚敕所司給木營兆造享堂碑亭祠祀之賜

額曰旌忠兩宮

聖母皇太后后妃等各賜銀幣有差病異數云公爲人齟齬廉謹澹泊無他嗜雅嗜書公務之暇手不停披能通諸史言尤明習法令故事引臧否切中事情先是

肅皇帝朝公以少年穎敏簡乾清宮近侍數歲中累遷至司設監太監僉押管事賜蟒衣又賜羅蟒玉帶業已貴幸矣而公兢兢自持彌勤彌恪無幾微席寵自矜之色由此日見親近特命內府得乘騎出入已調內官監太監扈駕幸承天已命爲乾清宮牌子隨



朝捧劍已掌銀作局印復賜金彩斗牛衣已又掌惜  
薪司印當扈駕時會衛輝行宮火公以身擁駕出烈  
焰中其司惜薪也見奸孔百出商人滋病歎曰嗟乎  
茲丘積而壑委者夫非民之膏血乎

祖宗設司謂何而令耗廢如是則亟爲禁奸塞竇省  
不經之費鉅萬尙稱便

肅皇帝嘉悅命乾清宮管事賜金寶帶環各一方駸  
駸欲柄任之矣隆慶初舊京守備官缺先

帝念重地非廉有才者處之不可詔公往公趣治行  
至則鎮靜無擾獨時時從學士大夫游揮塵譚古今

意瀟如也

今上踐阼召入司禮監秉筆賜坐麟仍令內府得坐  
櫬杌

皇太后手輯女訓以教六宮則簡公督教事尋掌內  
官監印五年春

皇太后將爲

上詳求淑哲正位宮闈公奉慈命歷江淮間所過秋  
毫無染

上以故益眷任親灑文雅端慎四字賜之給祿米百  
石自是內政專倚辦公矣公筦墩卽織悉惟謹又無

不當

上指逮相擇壽宮成

上謂公典事中人久閱歷多可屬以重事是以有總督工程之命未幾公以寢疾疏歸政

上不許疏再入乃許命月給廩三十石輿隸三十人并其名下二十八人以從雖拜命董匝日恩施優渥近代未嘗有也於戲寵利之際自惜難之彼其遇合負權赫然甚盛而釁瑕旋生傾軔繼路豈閨閣之臣貴重則不善哉不務修潔而挾重器多也若公可不謂善始善終邪蓋止足之戒公之所自爲計審矣至

其屏絕私門保全善類非正公不發憤斯亦有足多者焉其以榮名終非苟而已也公名宏字德夫別號容齋廣東新寧人其姪姪孫以公任爲錦衣指揮使者一爲錦衣正千戶者一爲錦衣百戶者三其生卒葬里詳具志狀中

復宿山房卷之二十九終

復宿山房集卷之三十

山陰對南王家屏著

行狀

光祿大夫柱國少師兼太子太師吏部尚書中  
極殿大學士贈太師諡文毅張公行狀

萬曆乙酉十月十六日故少師大學士鳳磐張公卒  
於蒲坂里第厥嗣兵部主事甲徵等告哀於朝恩命  
既下乃撫其生平行誼將乞碑誌於名世元老以垂  
不朽而先屬不佞為之狀狀曰公諱四維字子維中  
條有別峯曰鳳鳴山因以鳳磐自號云張氏自上世

居解州鹽澤南陂元季有思誠公者始遷於蒲其子友直公乃占籍焉友直生仲亨仲亨生克亮克亮生秀世以高義聞里中秀字彥實是爲公高祖生孟儒公諱寧配雷氏孟儒公生首陽公諱誼配王氏早卒繼配解氏首陽公生嵎川公諱允齡配王氏今少保鑑川王公姊也自孟儒公至首陽公皆以公貴累贈光祿大夫柱國少師兼太子太師吏部尚書中極殿大學士自雷夫人至王夫人皆一品夫人而嵎川公則親承封命凡六拜制詞焉初孟儒公之卒也雷夫人乳乳稱未亡人與其子女依外氏故首陽公德外人

氏爲雷翁媪木主祀于家首陽公好讀書居常手一編或爲鄉人誦說大義恂恂如也嵎川公生十年而首陽公卒解夫人亦乳乳稱未亡人事雷夫人惟謹里中號曰雙節嵎川公孝友仁厚惇信樂義外託什一以游而內操儒行楚蜀燕瀛之間無不知嵎川公名王夫人舍德而隱以勤儉治家語具申少師楊太傅所爲誌中

肅皇帝五年而公生公生而穎異甫能言解夫人抱持膝上問兒所欲公卽大言曰欲一當明主康濟天下解夫人大驚夫人時或不擇則具道異日顯親之

具以寬適其意未嘗不解頤而笑固知公非常兒也  
七歲就外傳動如成人出入必以禮同學者皆嚴重  
之十五舉茂才高等時督學劉公繇翰林出視學政  
高自簡貴鮮所許可見公年少有偉度異之則下堂  
循行因睨觀公草草未竟而劉公讀之以爲奇乃特  
移坐堂皇上更數題試公公立就于是劉公嘆服曰  
蒲卽多才易得耳若乃國士無雙遂置以爲第一自  
是每試未嘗不第一己酉舉鄉試第二人癸丑成進  
士以庶吉士第一讀中秘書公以爲國家待士厚不  
宜工鞿輓取世資以自菲薄於是取國家典故悉研

究之詢考四方利弊及輿革所由無不洞察當是時  
公已隱然負公輔之望矣華亭徐公嚮公甚謂異日  
濟大業者必在公公侍坐語及國計徐公曰此叅政  
他日之憂也其見期望如此乙卯授翰林院編修無  
何以毋王夫人喪歸戊午起家除原官是時寵賄滋  
章士以造請相尚公獨闢一齋與乾菴馬公正峯孫  
公數人吟誦其中自守泊如也當事者顧益重公已  
未克廷試掌卷官壬戌充會試同考官時王考相國  
袁公以博物策士當代對偶病不能具草以屬公公  
對具如袁公指袁公嘆曰真博物君子也八月充重

錄永樂大典分校官乙丑復充會試同考官及廷試  
掌卷官

莊皇帝元年丁卯重錄永樂大典成陞右春坊右中  
允兼翰林院編修予五品服充經筵日講官公盟心  
登對冀有所感悟每至政柄國計宮壺宦寺之類人  
所難言者未嘗不三致意焉右右侍臣聽之無不灑  
然變色易容者

莊皇帝肅然敬憚公是秋充順天府鄉試主考官冬  
陞左春坊左諭德兼翰林院侍讀代草誥勅兼清武  
黃戊辰充廷試受卷官武舉主考官是冬給假歸省

莊皇帝以公講幄勞特賜銀幣仍給驛以行己巳春  
還朝庚午秋陞翰林院學士掌院事故事學士不攝  
講讀銜則班僉都御史上途遇閣臣不引避朝廷重  
之未嘗輕授至是特以命公衆翕然謂

天子且相張公矣冬陞吏部右侍郎兼翰林院學士  
尋轉左辛未冬以疾乞歸至再

莊皇帝遣中使問疾賜羊酒蔬粢予告歸壬申春今  
上在東朝出閣講學詔慎簡轉導之臣乃起公克侍  
班官協理詹事府事尋掌府事兼教習庶吉士居無  
何復引疾歸

上踐阼之二年甲戌詔再起公以原官仍掌詹事事  
事克

肅皇帝實錄副總裁是時嶺川公年且七十矣公方  
朝夕色養扁所居堂曰愛日聞召不欲行嶺川公曰  
家世受國恩未有以稱塞奈何以老人負

明主寤寐旁招意公乃就道蓋公既入都而輿情手  
額且瞻僉願公蚤相

天子乙亥秋手勅陞公禮部尚書兼東閣大學士入  
內閣參與機務公疏辭優詔不許公既拜命侍

上講讀于便殿

上以御書一德和衷大字賜公公稽首謝既出

上顧左右曰新輔臣器度與衆不同注視者久之冬  
至駕幸南郊以扈從勞賜公蟒服麒麟服丙子春命  
代祀先師秋克重修會典總裁官

聖駕臨雍以公分獻冬至命分獻于園丘丁丑命爲  
會試主考官廷試讀卷官夏至命分獻于芳澤秋再  
命代祀先師

肅皇帝實錄成勅加公太子太保進文淵閣大學士  
賜鞍馬公之在宮詹也寔專綜實錄編摩事自嘉靖  
十年以後凡三十五年間朝章邊務國賦人才暨柱

下伏前之事衆覩記弗詳者公悉殫心探討博證而  
 精覈之犁然具備再踰年書成江陵公覽而稱善因  
 出舊所編初紀者盡屬公筆削乃定焉九月命主會  
 武宴冬至再命分獻于園丘戊寅春大婚納幣以公  
 克副使賜金花銀幣仍賜蟒服斗牛服各一以贄襄  
 六禮勞勅加公少保進武英殿大學士餘官如故予  
 三代誥命廕一子中書舍人冬扈駕南郊賜蟒服鸞  
 帶諸物已卯三命分獻于園丘庚辰春三命代祀先  
 師  
 上耕藉田以公克九卿首

上注視公終九推眷禮有加焉三月扈駕謁陵賜蟒  
 羅繡緜伽袋煖壺諸物廷試再爲讀卷官六月奏一  
 品三年績賜羊酒鈔錠加柱國少傅兼太子太傅餘  
 官如故再予三代誥命廕一子國子生辛巳春扈駕  
 閱武復賜蟒羅帶緜諸物冬四命分獻于園丘壬午  
 夏再命分獻于方澤六月遼左大捷  
 上嘉公運籌功進兼太子太師餘官如故復予三代  
 誥命廕一子世襲錦衣百戶先是天下苦江陵公法  
 令煩苛吏詭故釣名而民益瘠是月江陵公卒八月  
 遣



皇嗣誕生公乃因慶典密疏請下寬大詔省督責緩征歛舉遺逸賑災青以培養國家元氣

上憮然曰先生言是亟議行之公乃擬上詔書條格罷鑄錢丈田之令欲以漸罷政事不便者詔下郡國民忻然若更生而楚人故竊弄江陵公政權者皆側目攝公矣九月以大慶加公少師兼太子太師吏部尚書中極殿大學士廕一子尚寶丞初江陵公病時其帷幄私人日夜聚謀憚公等二三當軸臣皆正人且杜羣枉路乃詐爲江陵公遺疏薦起新昌公于家以自代俟其至首去公約三御史次第爲排公疏而

紹介逋逃罪人徐爵者往來關說干權璫馮保所保從中可之謀既定於是一御史乃先論罷王太宰一御史因重劾太宰及公

上曰元輔忠臣御史何得爲此言持其章不下而手詔諭公出視事最後御史疏復上

上怒甚奪其官三等出之於外公上疏引咎求歸而併乞宥言者

上褒荅不許無何言者發大司空回看不忠狀司空故所謂帷幄私人也

上遣中使至閣諭欲去司空意公疏對如

上指

上乃勒之致仕居數日言官論奏權璫保及爵表裏爲姦歷數其大罪

上覽奏震怒昧爽召公入朝令擬旨曰奴輩擅我威福久矣必速誅之乃下爵詔獄安置保于南京籍其家或追論江陵公與保爵交通毒害忠良狀

上曰此同罪何得無誅欲逮繫江陵公諸子籍其家公屢疏救解以爲彼誠負上然上始終遇臣之禮謂何且國體不宜如是

上猶未允公乃以去就爭之

上重違公意事以故暫已臺諫爭發舒黨人奸狀于是諸帷幄私人盡坐斥而猶抨擊不止公言於

上治道去太甚耳宜畧苛細存雅道

上從之時六卿半易朝省虛位乃請詔臺省舉骨鯁端亮之臣向所遺棄者布烈庶位一時六官之長皆民譽云每見必語之曰今

至上神聖公道昭明各舉其職無廢憲度閣臣自不相撓也於是事歸六列言歸臺諫公爲調劑而奏之更一切束濕之政期月之間朝宁改觀焉當是時公值鼎革之會鞠躬盡瘁知無不爲至廢食息一日

復宿山房集 卷之三十一  
上視朝公立金臺側忽眩暈而歛

上曰張先生不耐早寒耳命二中使扶送至閣癸未  
春二月詣天壽山恭閱壽官司禮監給器具尋乃扈  
駕臨閱

上陟降高山縱覽形勝顧謂近侍曰可用二人掖張  
先生以登其恩禮隆異如此三月爲廷試讀卷首臣  
是月岷川公卒於家四月訃至京師公哀毀骨立如  
不欲生

上特遣中使宣諭曰聞卿父辭世朕心甚悼孝情當  
盡允宜節哀以慰朕懷副衆望中使諭

上意欲奪情起公視事公泣曰生不逮養沒不奔喪  
何顏以立於世爲我謝

上臣死不敢奉詔中使具以復奏

上嗟嘆惋惜賜賻襚紵絲六表裏銀三百兩鈔萬貫  
及米油香燭諸物諭祭六壇遣禮部員外郎張志致  
祭工部主事沈一中造葬而王夫人得金祭焉公廷  
辭

上命馳傳賜道里費遣行人護行

聖母及 潞王賻襚各有差翌日面辭于文華殿稽  
顙奏曰臣行能薄劣日侍左右無所裨益今當遠離

伏望

皇上法祖孝親講學勤政清心寡慾惜財愛民日慎一日保終如始臣不勝惓惓

上荅曰先生輔政久朕所倚信茲以憂去其節哀自慰稱朕意焉因泣下殿中侍立者皆感動公既辭闕兼程以奔旦夕哭臨癰生於腋過陝州創甚扶病渡河至首陽不能進月餘始抵舍九月

上以閱定壽宮遙賜銀幣廕一子國子生甲申二月葬唘川公于勅建新塋葬之日公執紼痛哭徒步十餘里奉遷王夫人之柩與唘川公及繼妣胡氏合窆

焉輜車所至聚觀如堵見公悲號孺慕狀皆嘆息有垂泣者公既痛唘川公不得一見爲永訣而公兩弟又相繼卒繼妣胡亦卒公纍纍哀疚卒以身從焉蓋公初病腋癰繼病耳閉百藥罔效乙酉六月禫唘川公之喪而弟室及從子又亡公以盡傷復病脾泄十月朔禫繼妣胡之喪公已伏簣不能興矣月之既望晨戒僕人具盥漱整巾服扶藉端坐舉手揖空者三及昏而逝公天性孝友內行淳篤與人處斷斷不苟合而厚於故舊無間存歿初迎唘川公於京邸徵縉紳父老爲好會以適唘川公意事必咨而後行唘川

公既歸月一馳使問起居得家書必斂容屏息莊誦如侍側或久不至則憂曰吾親得無有所苦乎既登鼎足雖身理繁機而心時時念岷川公岷川公之卒也公歸抵舍憑棺一慟而仆所親或執六十不毀之文以解公曰吾拜慶而出銜哀而入吾終天之痛安能已也及兩弟之喪公雖病猶強起爲之經紀曰吾痛吾弟因痛吾親焉宮保楊南澗公自髫年知公南澗公沒公爲修葺其祠宇坊表執友劉君輩遺孤待公而舉火者數十家新鄭江陵兩公皆以才識交公驩兩公既輔政凡國家大事皆以咨公公亦盡言無

所諱新鄭公之去國也公方拜宮詹之命自獲鹿取道與會於欒城入都江陵公謂曰新鄭以得罪君父去公柰何見之公曰疇昔之交高公猶今事公也去而遠之謂交誼何江陵公乃釋然公生平嚴重簡默呐呐如不出口至其臨大政決大疑當機而斷自謂賁育不能奪也北虜款貢衆謂夷情且不測公獨陳便宜于新鄭江陵兩公所甚悉爾公聽之議乃定鑑川公嘗曰微伯甥在內吾事將不諧矣五開苗叛撫臣募卒討破之事平或言募卒皆四方烏合留之且生亂請罷遣歸田里公曰有事用之戰事已奪之餉

後宿山房集 卷之三十一  
何以使人是趣使爲亂也會滇南有警卽命將將此  
屬以往疏請留本省征輸備軍興之用所以卒定奔  
寇之亂者本公之謀云關中大饑公言於  
上出內帑賑窮乏蠲租賦民乃寧其應變定傾皆此  
類公歿十餘日計聞

上震悼爲輟朝一日諭禮部厚擬卹典以聞於是禮  
官奏稱故元輔當深文操切之後而廣聖恩薦忠謹  
去儉壬勞績勛著請賜祭葬贈諡

上乃命贈公太師諡曰文毅官一子尚寶丞諭祭一  
十有三壇官爲營葬則中書舍人鄭國俊山西布政

司叅政劉中立來致

上命始終恩禮備極隆異焉公配王氏儒官東泉公  
恩之女封孺人宜人淑人各一封一品夫人者三生  
子男六長甲徵癸未進士兵部武庫司主事娶楊氏  
次泰徵庚辰進士禮部儀制司員外郎娶孫氏封安  
人次定徵中書舍人娶楊氏封孺人次久徵官生娶  
羅氏次元徵官生娶楊氏獻徵早卒女三長適兵部  
武選司郎中馬慥封安人次字舉人楊煊次字庠生  
韓爌皆早歿孫男四替聘南氏輩輩皆幼孫女二  
公生嘉靖五年丙戌五月十二日卒萬曆十三年乙

西十月十六日享年周一甲子甲徵等將以丁亥三月十七日塋公于蒲之風陵鄉王庄里侯家庄之南公所自卜兆也某爲公桑梓後進寔踵公武于詞林初在史局誦公文章見其春容爾雅蔚爲宗工比從講筵竊窺公學術則見其直諒多聞納乎聖聽然而示睹公大全也公旣居中持國柄乃伏睹公憂勞夙夜蹇蹇匪躬以身任天下之重方其芟邪剔蠹一日而宇宙回春此與司馬文正公元祐之政豈異哉夫文正公晉人也閱數百年而公乃紹美其罷新法復舊章同旋乾轉坤之效同而勞瘁以致疾又同然遡觀其德則均之以誠心自然爲本云不佞何能贊公謹敘次公生平而稍爲衡槩之如此伏惟名世元老覽而財擇焉

武清侯贈太傅安國公諡莊簡李公行狀

公諱偉字世奇別號毅齋其先出山西平陽府翼城縣代有顯者永樂初曾大父政從

文皇帝靖難軍占籍順天府之灤縣遂爲灤人大父岡父玉俱以公貴贈武清侯母某氏贈夫人公生有異質童時與羣兒嬉里中偶羽衣道士過其前驚駭語人曰此男骨相奇偉異日當大貴位極人臣宜善

視之大父聞其語心獨喜拊愛異于諸孫常摩其頂  
曰聞先人言吾上世累德幾數百年後當大發豈在  
茲乎遂命其名曰偉從羽衣之言也公家故饒比長  
受室家漸落人或訝羽衣言大謬嘉靖丙午春公夜  
夢空中雲五色承輦旌幢鼓吹導之下直達寢所驚  
寤倉皇攬衣起猶隱隱若車騎紛綸狀鄰舍多與聞  
者不解何祥其冬十一月

聖母慈聖宣文明肅皇太后降里中異香彌旬不散  
司候言后星見燕分直帝城東南其地女家多喜自  
負莫能當之者庚戌秋虞闖近郊畿輔戒嚴公始携

家入京居數歲

聖母儷

莊皇帝裕邸癸亥誕今

上公乃悟羽衣言與嚮所夢悉徵客有賀公者公輒  
遜謝此宗社之慶也豈臣下所敢徼福隆慶改元

莊皇帝推恩戚里授公錦衣衛都指揮僉事壬申冊  
立今

上為東宮加公中軍都督府都督同知是年

上嗣登大寶尊兩

宮聖母為皇太后晉公爵武清伯追贈三代歲食祿



復在山人集卷之三十一  
千石賜乘肩輿尋以昭陵工完及朝宗橋成益祿百五十石戊寅大昏禮成推尊上兩

宮聖母徽號恩又益祿百石壬午

皇子生晉公爵武清侯仍給三代誥命官兩子皆都督公蒙受恩眷寵榮無與比而小心畏慎終始如一  
凡

聖駕躬祀南北郊若詣山陵及幸學耕籍必命公居守公晝夜部署宿衛士巡警不少懈數奉遣命告祭太廟及恭請

高皇帝神主配園丘必齋居熏沐而後將事一登臨

涉趨咸質諸禮與士大夫處無崇卑務折節爲恭敬然未嘗相干以私以是縉紳益雅重之多與之游先後蒙被恩澤所賜第宅莊田金幣寶鏹之類種種羨溢而自奉甚約凡狗馬聲伎珍綺玩好之具泊然一無所嗜朔望一食蔬素每晨起衣冠拜天畢卽望闕遙叩歲時伏臘輒建醮諸寺觀爲

聖母今

上祝釐以爲常暇日訓勅諸子惓惓以驕奢爲戒歲入租廡下輒指示諸子此顆粒皆出國恩宜共惜福慎無溢費又揭

聖母所賜謙謹持盈寶翰于庭語諸子曰懿訓昭然爾輩所宜恪守不可使後日謂外宗恣橫自吾門始以上虧

聖母之德覆車在前深可鑒也諸子奉教命循循一軌于禮度下至僕御亦皆歛迹市里無敢縱者又性慈祥諄言人過人有善稱譽若不容口聞人疾苦惻然憐之甚于己身嘗手調七劑濟人貧不能葬者給之棺槨歲不下數百他所施舍賑卹多不可紀忽遘疾以萬曆癸未十二月十三日卒距生正德庚午正月十八日享年七十有四訃聞

聖母與

上震悼無已爲輟朝一日賻贈加等賜諭祭二十壇勅有司治葬贈太傅安國公諡莊簡尤爲異數云配王氏封夫人子男三長文全次文貴並中軍都督府左都督文全婦田氏繼吳氏文貴婦俞氏並封一品夫人次進御馬監太監次女適平江伯陳公王謨子錦衣衛正千戶胤徵孫男四誠銘誠鉞誠鑛誠錫孫女八長適左都督朱公希孝孫錦衣衛指揮同知應梅餘幼文全等卜以今年月日奉公柩塋於阜城關八里庄賜地墨衰過某列公行事嗚咽請狀某與同

里習知公謹厚謙挹無戚里富貴態其所稱述皆不虛遂次第其語爲狀備鉅公采擇

先考贈吏部左侍郎兼東閣大學士石溪府君妣贈淑人韓氏梁氏景氏事畧

孤不幸先妣韓蚤世先考不忍棄孤襁抱中爲孤兩續如母也者而撫之立而不幸先考又卽世金訕一日之養焉晚竊薄祿逮養繼妣景于京徃歲又不幸見背養又不終此孤窮號極痛怛焉傷心而不欲生者也荷

主上哀憐寵之優卹自先祖考先考皆得贈爵如孤

官先祖妣先妣皆贈淑人給之誥命仍遣官營塋諭祭三泉之下式靈承之惟是先考妣潛德隱行里門外不盡聞非得當世名公筆而傳之烏能垂不朽謹撫家人所睹記次第其語乞狀門下幸賜收采先考府君諱憲武字克定別號石溪其先出太原自太原徙京兆之鳳翔有長眉王氏者國初以材勇簡克南京龍江左衛衛士從

文皇帝北上遣屯雲中塞遂卽山陰家焉七世祖顯顯生文秀文秀生得林得林生冲朝邑典史冲生縉臨邑知縣有惠聲歿而祀于鄉臨邑公配溫氏生三

于季朝用殖學不售以儒官終是爲先大父配趙氏  
生四子伯憲文少縱失學數從里中豪恣游破產欲  
盡所遺瘠田草屋先大父推以畀府君曰兒與兩弟  
共之兩弟衣食婚娶盡在此中矣時府君年十五痛  
家中落慨焉願任力服父事則挾筴之田且耕且讀  
而責家日持券闕于門求伯伯走府君身往謝責家  
與期而償以致伯而內不令先大父知也弱冠補邑  
弟子聘先妣韓淑人爲壽官廷瑞公第四女廷瑞公  
與大父同廩學宮相善數器重府君因予女焉當昏  
行徵錢幣弗辦而廷瑞公資女甚厚府君檢其奩簪

珥服玩非家故所徵聘物悉謝弗納已廷瑞公更裹  
糧載薪遺之又謝弗納曰丈人豈謂壻貧不能贍其  
室而倚外家以生耶壻寔不貧於是廷瑞公重壻志  
第誠諸子無狎王生王生戇壻也而是時僚壻馬君  
饒于貲陳君米君金富文學有雋譽府君以寒素介  
其間屹屹不少孫而三君顧益折節暱就府君久之  
府君內愧自訟已則不競而務上人徒以成人之容  
德乎乃退而以門內事屬先妣脫身從友讀書城南  
山寺三年文奇進試于督學蘭谿章公大見稱賞以  
其年餼學宮由是姻族子弟多執經從府君游者則

復率弟子講業于山寺二年會先大父廢明家寢多故始歸侍先大父邑居而爲兩弟置婦且時時問遺女兄弟于夫家不絕也姊夫張患篤疾垂殆載詣府君府君推室而居之爲營醫治療積歲弗瘳歿而調棺歛葬焉先大父歿家指日衆子女及兩弟子女訓育婚娶復無一人不倚府君立者已伯自遠外携二子羸身歸府君抱持哭甚慟自解衣衣伯而解諸子衣衣兩姪引伯上坐率子弟前酌勞問絕口不及廢箸事懼傷伯心也乃更割園宅一區贍之府君雖不幸多家累而才局精敏未嘗以冗劇廢書每晨起程

書讀書不中程夜嘗足之訓課子弟亦然以是子弟多斌斌成就者辛酉督學餘姚宋公校士舉進諸生高等前府君獨前十數人列後莫敢前宋公怪問故乃知皆府君弟子門人也嗟異久之因出府君卷示邑宰曰此其文固優爲人師矣凡六試省闈不利以甲子貢於太學就教未除而聞孤舉于鄉也亟治裝歸歸而數置酒召客飲飲嘗竟日已病欬漸不勝酒侵尋增劇卒是爲嘉靖乙丑六月廿七日距生正德己巳正月廿五日春秋五十有六府君頽貌修髯丰神峻整居常攝衣冠坐子弟肅容色後敢入而言

囁嚅莫敢盡出行里中人望見之咸驚謂王先生來相率避匿而府君步趨滋益恭雖暮夜被酒泥潦在途人未嘗見其託邪徑走也節帥部使行縣有問府君占對侃侃靡所遜避嘗以輸輓徵顧直病民與度支郎彭抗辯彭不能訕督帥麾下胡騎數百夜叩關時方城守府君與守者言暮夜之戎不可不審宜距勿納翌日督帥至恚甚廷詰諸生據城者主名府君前曰賊兵壓境孤城危于累卵而偏師以胡服夜臨不具鉦鼓亦無部曲橫驚原野妄有擊傷愚民無知轉相驚惑所以嬰城固守防虜禍也敢距軍吏時胡

騎頗邀殺避兵老幼及僇僵尸首爲功故府君微言之而督帥恚益甚擬傳諸生守城者罪會分守楊公守愚人白督帥兵寔不戢矧可以逞請旦日驗首功一夕棄鞬馮城內外阡塹皆滿督帥意始解不復咎諸生而邊城遠近咸籍籍重府君名稱快矣其他慷慨扶義振人緩急出之于尼自三族之外百里之內類多德之而立意較然耻以利傷行遠之若糞溷焉從兄死無後宗人瓜分其產割一券遺府君家故廢業也府君曰以吾視廢業不啻遺跡安忍利人之絕攘爲已有乎謝弗受族婦爲虜所掠脫縛歸無依鞞

瘞欲死府君憐而收之屬婢掖以臥起三閱月愈里人娉以爲妾府君曰義婦不爲虜而爲妾乎卻其娉更擇善配遣之忻口武氏府君逆旅主人也娉婦未娶而女家亡徙塞下賣爲劉氏女跡得之請贖劉氏弗肯出女府君爲厚具錢布贖以歸不告所費踰年復過忻口則婦已抱子矣武舉室叩堂下奉觴爲府君壽其隣里爭欲識府君面相與竊窺府君讚以爲長者府君三醕起仍厚遺之乃去而生平所最恨者惟剽人陰事於坐間竊竊偶語嘗掩耳不願聞甚則投袂起曰奈何藉他人是非爲口實行酒乎鬼神忌

之矣人至今服其言先妣韓淑人諱妙善父鉄廷瑞其字母王媪懷仁人寧陽尹洪女先妣性敏慧精女紅兼通書史兒時聞外祖授舅書三四讀已能然記覆之一字不錯也外祖奇之別授以孝經小學女誡諸篇無幾誦輒徧旣笄歸府君室四壁立而所齎裝資從府君謝歸置不問獨携一女奴布巾笥盥器其中泊然安之若素處窮約者三日媪率諸姨來視女致饋賓從車騎甚夥府君欲勿納客更日而款妣從容言今客以具來與其更日款不若因其具饗之省且無失意於客也府君曰甚善顧視若能辦不耳妣

則易服入厨次劑肴載而進之徧饗內外客下逮厮役靡不霑飫去者客起大父謂府君吾家以貧故久謝客今一日而饗客數十輩盡其驩非新婦不及此家庶幾復振乎府君讀書山寺也或旬月一歸或踰時不歸所需衣廩妣常預儲以待橐而授兩叔致之而敬養翁姑衣食兩叔復克然各得所欲不以匱乏聞也以是得安府君于學無返顧焉與諸妣處甚睦而郭尤愛郭叔憲成妻侍御聚菴公妹妣溫惠柔明郭婉孌恭讓故兩人深相得焉嘗趣膝金乳兒共泣居窮期異日兒立無相忘也乃兒立而兩姆俱不侍

矣孤自孩抱卽嚴府君無敢啼笑翔嬉其側五歲而府君授之書訶禁愈厲妣不敢面護兒抱置牖下舉所授書耳提數過俟習乃遣就府君府君或命之屬對亦往往受先妣指乃應也妣旣病革執孤手囑府君幸寬兒當有成痛吾不及見耳語訖瞑是爲嘉靖壬寅九月初五日生正德己巳四月初十日得年三十有四子男二長卽孤家屏配霍氏累贈淑人封兵部主事宗嶽女繼李氏累封淑人邑處士松女次小閨殤女二長適閻允諧鞏昌府倅瑞子次適庠生趙國賢俱先卒孫男六濬初乙酉解元娶翟氏大理評



事廷楠女湛初庠生娉郝氏浙江按察使杰女娶孫氏兵部郎中訓女沛初娶薛氏陝西憲副綸女汲初娉安氏湖廣方伯嘉善女青錢青旂幼孫女四長適國子生郭煥然先卒次許娉通政司叅議田蕙子中顯殤二幼俱家屏出曾孫男三泰庚娉覃氏陝西憲副應元孫女二幼曾孫女一濬初出妣韓歿妣梁入繼代州振武衛處士梁公繼宗女歸府君七年卒爲嘉靖庚戌八月十八日年二十有五生二子不育妣梁歿妣景入繼同邑景公聰女始妣梁肅括子女以嚴稱家事取辦願指而治焉妣景入拊子女有恩於

孤尤篤其衣食孤也美好常偏給焉曰孺子長而材也孤有過常曲庇之不以聞府君諸子有過不俟聞府君扶勉之矣其治家蚤起晏息自春炊浣濯無一不躬其勞而自奉皆最下草具卽垂老不更其儉也孤旣第迎妣于京爲具甘毳一舉七攝衽輒迎天祝始吾食貧時詎圖有今日哉吾知福矣見遺粒于地必惜得尺縑寸帛必鏹而藏之雖子女不輕畀也府君常言吾三娶而知婦德之難也梁能施不能蓄景能蓄不能施意蓋嘆先妣云然終佐府君立家者妣景之力也歲丙戌孤再迎妣于京視妣善飯私喜忽

一夕暴下暈仆地飲藥甦甦數日復下藥弗效趣召  
兩弟于家三日夜馳至竟待其來與訣卒時八月二  
十七日也享年六十有四子男二家壘廩生兩娶郭  
氏典簿應宸女繼李氏鴈門李祿女張氏張永安女  
家楫娶霍氏宗嶽弟宗道女女二一適許天祿一適  
庠生李木蚤寡以節自誓孫男三漢初青編家壘出  
青衿家楫出葬以萬曆十六年三月初一日勅建塋  
域在縣北四十里周家庄南嶺下負亥抱已嗚呼先  
考妣困田間至彫窶矣乃其裋躬立家咸卓然有趣  
操可述孤幸際熙朝祿食二十年而悠悠曠瘵靡尺  
寸自託于世負國恩忝先懿有餘僇矣考德立言無  
以孤之不類而槩所生並廢其美不著也慟哉

復宿山房集卷之三十一終



